

MINISTRU PREZIDÉNSIA KONSELLU MINISTRUS

FIDELIS MANUEL LEITE MAGALHÃES



DISKURSU

IHA SESAUN PLENÁRIA KONA-BA MEDIDA EKONÓMIKA SIRA

Parlamentu Nasionál, Loron 20 Fulan-Outubru Tinan 2020

INTRODUSAUN

Iha tinan 2020 nia laran, ita-nia NASAUN hasoru dezafiu istóriku no sein presedente sira. Ita tama ba tinan ne'e ho restrisaun orsamentál ne'ebé forte tebe-tebes. Tuir previzaun, ida-ne'e sei lori ita ba períodu kreximentu ekonómiku negativu seluk ida. Ita moris iha situasaun impase política ida-ne'ebé la'ós baibain. Iha fulan fevereiru, COVID-19 deklaradu hanesan pandemia globál. Iha fulan-marsu, mosu kazu dahuluk iha ita-nia NASAUN.

Bainhira haree ba situasau ida-ne'e, ita tenke hateke ba kotuk. Ita tenke reziste hasoru tendénsia retrospetiva, atu avalia saida maka akontese ona husi fulan-marsu to'o fulan-maiu ho saida maka ita hatene agora, ho informasaun ne'ebé ita hetan hafoin faktu ne'e. Hanesan ha'u dehan, Timor-Leste nu'udar NASAUN ida mós husi NASAUN 23 de'it, iha ne'ebé laiha ema ida maka mate tanba COVID. Husi NASAUN 23 ne'e, ita NASAUN maka nu'udar NASAUN boot liu daruak. Iha momentu ne'ebé ita deszeenvolve resposta, ita-nia política na'in sira tau sees tiha sira-nia diferensa sira. Ita-nia sidadaun sira halo tuir regra sira. Sira fase liman, uza máskara no mantein distánsis sosiál. Hanesan ha'u dehan, ita-nia sidadaun sira, maizoumenu, fila daudaun ona ba vida normal. Atu koloka konkista ida-ne'e iha perspetiva, bele haree notísia sira. Ita haree NASAUN sira seluk, riku ka kiak, sofre tanba pandemia ida-ne'e, ho número ema mate nian ne'ebé sa'r ba beibeik, *lock down* fila-fila o luta política interna. Senáriu ida-ne'e maka, tuir ema barak nia haree, bele akontese iha ita-nia rain. Tanba ne'e maka parseiru dezenvolvimentu nian no embaixada balun evakua sira-nia sidadaun no sira-nia funzionáriu sira. Bainhira hateke fila-fali ba kotuk, ita tenke hanoin mós kona-ba projesaun ekonómika sira iha momentu ne'ebá, ko'alia kona-ba depresaun ekonómika no kolapsu ekonómiku.

Mai ita hanoin fila-fali saida maka akontese iha fulan-abríl ne'e. Karik iha fulan-abríl ita bele haree agora daudaun ita iha ne'ebé, ema mate laiha, ho ita nia moris loron-loron nian fila fali ba normál iha fulan-maiu ka fulan-juñu, ita bele konsidera ida-ne'e hanesan susesu boot ida?

Permite ha'u fó detallu balun ba ita-boot sira kona-ba impaktu negativu sira ne'ebé bele mosu iha momentu ne'ebá no kompara impaktu negativu hirak ne'e ho buat ne'ebé akontese duni. Iha momentu pandemia ne'e mosu foufoun, komunidade internasional (Índice Risku Global INFORM) prevee ona katak Timor-Leste bele iha tan problema sira kona-ba saúde no ekonomia, no sira-nia número indika ona nível risku daruak ne'ebé boot liu ba Timor-Leste, iha rejaun ne'e tomak. Iha momentu ne'ebá, diskusaun internasional sira mós sujere katak medida sira-ne'ebé Estadu foti bele lori kustu (umanu sira) boot liu fali moras ne'e rasik – liuliu iha NASAUN sira iha faze dezenvolvimentu nian hanesan Timor-Leste. Iha nível inserteza nian ne'ebé boot tebetebes iha fulan-marsu no fulan-abríl, kona-ba xoke saúde nian, ne'ebé resulta iha eventu katastrófiku sira, ho estimativa kona-ba ema mate maka 390 no 11.700. Ha'u repete fila fali, senáriu aat liu prevee katak mate bele to'o 12.000. Aleinde ne'e, resultadu negativu sira ne'ebé bele mosu ba ekonomia iha tinan 2020, iha ne'ebé senáriu previzaun nian ida-ne'ebé pesimista hatudu katak Timor-Leste sei monu maka'as iha kreximentu PIB nian, ho -9,3 porsentu (Banku Mundiál, fulan-Abríl tinan 2020) ba tinan ne'e nia rohan.


Faktu husi kestaun ne'e agora maka katak ita evita duni ema mate – ida-ne'e de'it bele kria benefisiu ekonómiku substansiál. Salva no proteje ema nia moris mak importante no ida-ne'e mak política ekonómika ida ne'ebé sólidu, ne'ebé ekivalente ho parsela signifikativa ida husi PIB.

Projesaun internasional sira ikus ne'e prevee agora daudaun katak ekonomia Timor-Leste nian sei sofre kontrasau besik 6,8 porsentu iha tinan 2020, revizaun ida-ne'ebé iha deklíniu signifikativu boot hamutuk porsentu 9,3. Bele-bele, ida-ne'e akontese tanba medida estabilizasaun ne'ebé hamenus impaktu sira ne'ebé grave liu husi COVID-19. Revizaun ba previzaun sujere katak ba

daudaun ne'e ita hakat liu ona senáriu aat liu, maibé laiha buat ida mak iha serteza bainhira pandemia ne'e seidauk menus iha mundu tomak.

Maibé, eziste observasaun fundamentál sira ba projesaun sira-ne'e. Ida, sei iha inserteza barak (medida rekuperasaun nian sira ne'ebé governu sei implementa sei ajuda atu halo kamaan impaktu ba empreza sira no ema-nia moris sira, no iha possibilidade atu onda daruak virus sei tama iha asaun. Daruak, kontrasaun ba porsentu 6,8 mós integra ba efeitu sira ne'ebé bele mosu tanba fatór político no ambientál sira (impase político iha inísiu tinan ne'e nian no falta orsamentu estadu nian ne'ebé lori restrisaun ba gastu público sira: no inundasaun no udan boot sira), enkuantu sira seluk mosu tanba impaktu xoke sira husi COVID-19. Datoluk, ita la'o daudaun ba aumento PIB nian iha trimestre datoluk tinan 2020 nian, bainhira atividade sira-ne'e la'o normal fila fali ho lalais liu duke ida-ne'ebé ita espera.

Ita sei avansa neineik iha diresaun ba trajetória atividade ekonómica ne'ebé projeta ba pré-pandemia ba período 2020-2025 (haree figura), ne'ebé sujere katak iha possibilidade efeitu pandemia ne'e nian ba atividade ekonómica sei dura liu fali medida rekuperasaun nian ne'ebó foti governu, no PIB sei rekupera neineik. Mezmuke hafoin risku sira ba saúde bele hamenus, ekonomia sei demora uitoan atu fila fali ba nível anteriór virus PIB nian, maske bele to'o iha ne'ebá. Projesaun internasional sira prevee katak taxa kreximentu ne'ebé projeta Timor-Leste sei sa'e ba 3,1% (Banku Mundiál), 3,3% (Banku Aziátiku ba Dezenvolvimentu) ka 4% (FMI) iha tinan 2021, ne'ebé natoon atu rekupera nível atividade sira husi tinan 2019 (3,9%). Rekuperasaun ne'ebé projeta ba tinan 2021 forte liu duke nível sira iha tinan 2018 (-0,8%), 2017 (-3,8%), 2016 (3,4%) no 2015 (3,1%). Importante tebes atu nota katak merkadu emergente sira no ekonomia sira iha faze dezenvolvimentu nian sei bele sofre kontrasaun iha tinan ne'e, liuliu Tailândia -8%, Filipinas -7,3%, Singapura 6,2% no Malázia -5%, no sira ne'e bele iha dezempeňu di'ak liu iha mundu. Rezultadu sira-ne'e iha parte mundu nian sira seluk, bele atat liu fali. Revizaun ba leten husi previzaun kreximentu ne'ebé aas ba Timor-Leste hatudu katak governu la'o hela iha diresaun loos.



©IMF, 2020, Source: World Economic Outlook (October 2020)

Maske agora daudaun la eziste ona kazu COVID-19 nian iha Timor-Leste, maybe família sira sei hamenus sira-nia konsumu no mós espera katak empreza sira sira sei kuidadu didi'ak nafatin no sira sei bele atraza tan desizaun investimento nian sira. Ho padraun rekuperasaun nian, ne'ebé ekonomista sira bolu rekuperasaun sira ho "forma U" ka "ho forma swoosh", sei hein katak ekonomia sei hatán neineik liu, mézmuke bainhira governu hahú suspende restrisaun sira. Maibé, resesaun foin hatudu ladún grave duke ne'ebé ida-ne'ebé prevee katak bele, tanba normalizasaun ekonómika no ita-nia medida fiskál sira hasa'e kreximentu ekonómiku.

Relatu ne'e fó mai ita instantáneu estensaun ida kona-ba dezlokamentu ekonómiku bainhira COVID-19 atinje Timor-Leste, maske, resesaun koronavírus lori moai bele kamaan no ninia moris parese badak, iha ne'ebé atividade monu iha trimestre 2, maibé ita hein katak rekuperasaun bele hahú iha fulan-agostu no setembru, bainhira ekonomia loke fila-fali ona.

Atu tau iha kontestu, importante atu destaka katak, sein medida sira ka resposta ruma ne'ebé tarde no moderadu husi governu, ema ne'ebé mate no ema moras tanba COVID-19 bele afetamaka'as liu

família, sosiedade no ekonomia, no iha tempu hanesan bele aumenta nível pobreza no dezigualdade nian. Ita konsege kontrola “tempestade perfeita ida” no xoke ekonómiku ne’ebé maka’as liu iha ita-nia istória dezde ukun rasik-an tanba asaun política ne’ebé brani no, importante liu, konsensu político ida-ne’ebé forte.

RESPOSTA BA COVID-19

Iha períodu tempu nian ne’ebé badak tebes, Governu gasta ona osan hamutuk US \$ millaun 91,7 hodi implementa medida resposta ekonomika nian hamutuk 19. Iha semana hirak hafoin estadu emerjénzia, sentru krize emerjénsia nian ida harii; mekanizmu ida hodi finansia ba resposta kria ona; medida sira ne’ebé maka projeta, tau iha debateativamente no hetan akordu. Lejizlasaun subsidiária implementa ona ho lalais tebes. Iha momentu ne’ebá, NASAUN hala’o ho prinsípiu responde di’ak no halo ho responsabilidade, la’ós responde ho perfeitu. Prefeisaun iha ambiente hanesan ne’e la’ós no la posivel. Partidu político hotu-hotu, inklui opozisaun, ho firme koloka NASAUN iha prtidu nia leten. Timoroan, husi kamada sosiedade oin-oin, hamutuk ida de’it.

Liutiha loron balu hafoin krisaun estadu emerjénsia, subsídui eletrisidade nian implementa no bee-moos fornese ho gratuita. Iha tempu ne’e, ita-nia depózitu aihan mamuk hela. Maske bastesimentu sofre kolapsu makaas iha mundu tomak, ita importa ho susesu foos tonelada 30.000 husi Vietnam. Durante períodu ne’e, ita mantein konektividade internasional liuhusi Darwin. Aviaun kontinua tula ekipa médica no sasan médiku importante sira. Esénsia husi ita-nia resposta maka apoiu osan ba uma-kain sira. Lojística ba ida-ne’ebé kompleksa tebes. Intervensaun projeta husi zero. Ita rejista uma-kain sira iha suku hotu-hotu; ita dezenvolve prosedimentu operasional; ita mobiliza seguransa no transporte; no fundu sira transfere ba BNCTL nian Sukursál Munisipál hotu-hotu. Iha fulan rua nia laran, kada família hahú simu ninia apoiu finanseiru. Atu garante produsaun aihan, Ministériu Agrikultura, Floresta no Peskas distribui dolar millaun ba insumu agrícola. Alunu sira iha rai-liur ne’ebé hela de’it iha uma ita rejista no fó apoiu finanseiru, ezersísiu seluk ne’ebé presiza iniciativa lojística ne’ebé boot tebes.

Klaru katak medida balun dezafiadora duni. Ita atraza atu estabelese programa sira kona-ba aopiu ba krédito liuhusi ita-nia sistema bankáriu, no subsídia salariál hatudu duni katak susar atu implementa.

Klaru katak ita-nia resposta la perfeita. Maibé, karik ita haree liu de’it, itahahú husi zero, husi surat-tahan mutin ida, iha situasaun ida-ne’ebé pratikamente la iha rekursu finanseiru, ba debate saudavel ida no akordu amplu ida kona-ba saida maka atu halo, ba mobilizaun fundu, no ba implementasaun husi medida apoiu ekonómiku nian lubuk ida, iha tempu pandemia no ta’uk nian, ne’ebé implementa hotu liuhusi Ministériu, ajénsia no estrutura emerjénsia nian oin-oin.

Ita la’o liu ona dalan ne’ebé naruk hodi aprende katak, aleinde ita bele preene ema mate, intervensaun governu iha saúde pública no iha ekonomia bele halo output ekonomia no kustu konsumu Covid-19 nian la’o ho di’ak. Karik haree didi’ak ita parese hetan ona susesu “hatetuk kurva resesaun nian”. Parese ita-nia pkote medida ekonomia nian hamutuk 19 ajuda ona hodi apoia família no empreza sira, katak ita evita parcialmente resesaun masiva ida ne’ebé sei remata tinan ne’e ho diminuisaun iha PIB porcentu - 9,3.

Iha fulan-agostu tinan 2020, Fundu COVID-19 nian atribui ona orsamentu hamutuk US millaun 91.716.636, iha ne'ebé US \$ millaun 88.274.151 maka gasta ona ba estímulu ekonómiku (88,3%).

Maske iha dezafiu oin-oin, Timor-Leste hetan ona susesu ne'ebé di'ak tebes iha área saúde no ekonomia. Timor-Leste sei konsideradu hanesan istoria susesu internasional nian ida kona-ba oinsá ita-nia nasau responde ona ba krize ekonomia no saúde. Oras ne'e, bele dehann, iha Timor-Leste moris la'o normal fila-fali ona. Ida-ne'e la akontese iha Europa. La akontese iha América Norte. La akontese iha América Sul. No Infelizmente, ida-ne'e la akontese iha Ázia Sul no parte oin-oin Ázia nian.

Haree apéndise ba Ezekusaun Orsamentu.

REKUPERASAUN

Planu rekuperasaun ekonómika ida aprovadu tiha ona, ho foku ba agrikultura, turizmu, abitasaun, edukasaun, saúde, protesaun sosiál no reforma institucionál. Planu ne'e kombina medida ba prazu badak no prazu médiu hamutuk 71 ne'ebé Governu Konstitusionál VIII sei implementa to'o tinan 2023.

Planu ne'e fahé ba etapa rua: etapa dahuluk ninia objetivu maka atu hamenus impaktu COVID-19 nian liuhusi reposta prazu badak (liuliu iha semester daruak tinan 2020 nian), no etap daruak ida ho medida sira médiu prazu nian ba rekuperasaun ekonómika (ne'ebé kobre períodu tinan 2 to'o tinan 3). Faze dahuluk atu evita lakon empregu, apoia família sira no prevene taka empreza sira – ho objetivu atu mantein nível konsumu no padraun moris nian. Medida sira ba prazu badak inklui fahé bote nesesidade bázika nian (ka voucher) ho valor \$25 ba kda ema (uza rejistru Uma-Kain), subsídui rekuperasaun fulan haat ba empreza sira ne'ebé rejista lakon rendimentu, no izensaun kontribuisaun sira ba seguransa sosiál.

faze daruak ne'e atu hatán ba dezafiu sira ne'ebé kauza husi pandemia, no mós ba problema estruturál sira. Faze ne'e kobre area sira hanesan:

- **Agrikultura** (no agro-indústria ki'ik). Foku ba Kafé (liuhusi subsídui ida hodi apoia renovasaun plantasaun sira) aleinde ai-kameli no ai-teka. Ba oin, Governu prevee implementasaun política substituisaun (parsiál) ida ba importasaun, liuliu husi foos.
- **Turizmu.** Ninia bjetivu mak atu kria empreza estadu ida hodi implusiona setór ne'e, hadi'a edukasaun no formasaun profisionál, reabilita infraestrutura (hanesan rezidénsia administradór nian tuan sira no estrada rurál sira), no promove ekoturizmu (ho kombina fatin alojamentu nian ho kafé laran ka natar)
- **Abitasaun.** Planu ne'e ninia objetivu maka atu implementa programa abitasaun sosiál nian ida ne'ebé Instituto Nasional Seguransa Sosiál ka instituisaun foun ida maka sei jere, nune'e bele alkaansa universalizasaun saneamento báziku, bee no enerja elétrika iha nasaun laran tomak.
- **Edukasaun.** Ninia objetivu mak atu aumenta proporsaun orsamentu Estadu ne'ebé alokadu ba setór ne'e, aumenta número eskola CAFE sira – nune'e mós rede eskola sekundária, pré-eskolár no sentru formasaun profisionál – no promove manutensaun no rekuperasaun edifísu eskola nian sira.
- **Saúde.** Ninia objetivu maka aumenta gastu rekorente sira hodi hadi'a kualidade serviisu saúde nian, fortalese apoiu finanseiru no tekniku sira ba programa prinsipál sira (hanesan saúde iha família, saúde escolar no saúde iha serbisu) investe iha infraestrutura, no hadi'a formasaun ba pesoál saúde nian.
- **Protesaun Sosiál.** Ninia objetivu mak atu kria mekanizmu pagamentu alternativu (atu evita selu osan direta no hamenus kustu) aumenta koberitura 'Bolsa da Mãe; aumenta protesaun (ezemplu, mate iha rejime la'ós kontributivu) implementa programa empregu ativu nian no avalia viabilidade husi rendimentu báziku universal ida.
- **Aspetu institucionál.** Ninia intensaun ne'e maka aprova lejizlasun hotu-hotu ne'ebé pertinente ba kestaun fundiária sira, elabora no aprova lejizlasaun emprezariál (hanesan rejime falénsia) hadi'a funzionamentu tribunál sira no reforma administrasaun pública.

- **Instalaun fibra óptica.** Ninja objetivu maka implementasaun fibra óptika iha nasun laran tomak, liuhusi fiu iha tasi okos ne’ebé liga Timor-Leste ba mundu tomak.
- **Fonte enerjia renovavel, sustentavel no alternativa.** Planu ne’e atu halo promosun fonte I enerjia renovaven sira – liuliuloro-matan, bee no anin.

SEKSAUN FINÁL: PRAZU NARUK

Pandemia ne’e oferese oportunidade ida ne’ebé importante atu ita aprende. Forsa husi ita-nia povu no ita-nia unidade nacionál ita bele haree momoos. Maibé ida-ne’e akontese mós ho dezafiu ne’ebé ita nafatin enfrenta. Ita-nia prioridade política sei habelar objetivu ekonómiku ne’ebé amplu husi Programa Governu Konstitusionál Daualuk nian, atubele harii dalan kreximentu sustentavel nian ne’ebé forte liu no dezenvolvimentu ekuitativu.

Dahuluk, ita-nia política makroekonómica sei apoia liu dezenvolvimentu husi setór produtivu sira (agrikultura, turizmu, petróleo, minerál no manufatura), promosaun setór privadu no fortalese ita-nia sustentabilidade fiskál no indústria finanseira, tuir seksaun 5.1 husi ita-nia programa Governu nian. Ida ne’e mós signifika katak ita sei revitaliza oinsá política makroekonómica apoia dezenvolvimentu infraestrutura nian, serbisu ba foinsa’e no konstrui rekursus umanus no kapasidade ita-nia instituisaun pública sira nian.

Daruak, sei reforsa no implementa política sira hodi garante implementasaun husi asaun no estratéjia sira ba kreximentu sustentavel no dezenvolvimentu ekuitativu iha nasaun hotu. Ida-ne’e envolve prioridade imperativa sira hanesan tuirmai, ne’ebé iha relasaun ho Programa Governu nian:

- **Dezenvolvimentu agronegósiu, peska no turizmu** hanesan setór hirak ne’ebé potensiál tebes atu apoia transformasaun ekonómika país nian iha prazu badak no prazu médu liuhusi investimentu ba agregasaun ho valór no kualidade di’ak ne’ebé haree ba merkadu importasaun nian. Ida-ne’e hanesan baze fundamentál ida ba dezenvolvimentu ekonómiku no sosiál país nian. Iha oportunidade importante atu aproveita iha tranzisaun husi produsaun subsisténsia nian ba produsaun emprezariál produtu agícola, pekuária, peska nian (seksaun 4 husi Programa Governu nian).
- **Teknolojia sempre sai hanesan motór prinsipál ba dezenvolvimentu.** Tanba ne’e, aproveitamento ba teknolojia hanesan promesa boot ida ba setór-xave sira iha dezenvolvimentu prazu naruk Timor Leste nian, ne’ebé inklui turizmu no komérsiu, hanesan mós ba modernizasaun Estadu no hadi’a prestasaun servisu husi instituisaun pública sira.
- Forsa traballu ida ne’ebé kualifikasiada maka kondisaun nesesária ba dezenvolvimentu ekonómika sustentavel, ne’e impulsiona atuálizasaun kualidade husi produtu no kreximentu husi produtividate, estimula empriendededorizmu no seluk seluk tan. Tanba ne’e, ita sei kontinua hadi’a kualidade husi ensinu no fromasaun profisionál, hodi garante asesu ne’ebé hanesan ba populasaun timoroan hotu iha área ensinu nian (seksaun 2.1 husi Programa Governu nian).
- **Ita sei revitaliza promosaun ba indústria hanesan forsa ne’ebé dudu dezenvolvimentu ekonómiku nacionál** (seksaun 4.5 husi Programa Governu nian). Parké Industriál Timor Leste nian ne’ebé planeadu ninia objetivu mak atu atende setór lojística no armajenamentu tanba ninia pozisaun únika iha korredór ekonómiku prinsipál sira. Ita sei fó apoiu ba setór komplementár sira tuir sira-nia kapasidade atu atende ba objetivu sira husi parké industriál ne’e, hanesan agregasaun valór no diversifikasiun ekonómika, ne’ebé iha ninia parte tenke aliñada ho estratéjia ekonómika no indústria ne’ebé ampla liu.

Apéndise

KÓDIGU	ÁREA POLÍTICA/ESTRATÉJIA	A: ORSAMENTU ORIJINÁL	B: ORSAMENTU NE'EBÉ REVISTU ONA	C: TOTÁL GASTU	D: SALDO/ (B-C)	EZEKUTA ONA (C÷B)
	1 Konetividade Transporte nian					
5080601	1.1 Subsídu ba vuu semanál 3 Dili-Darwin (MTCI)	\$585,009	\$1,813,609	\$1,514,836	\$298,773	83.53%
	1.2 Subsídu transporte marítima merkadoria nian (viajen 2/fulan:MTCI)	\$90,000	\$0	\$0	\$0	0%
	2 Distribuisaun suprimentu sira					
5890103	2.1 Garante suprimentu foos iha situaaun emerjénsia ho suficiente no halo distribuisaun ho seguru besik MT 19.000 (CNL)	\$18,216,815	\$16,962,500	\$16,500,000	\$462,500	97.27%
	2.2 Apoiu transporte karga durante oras 24 nia laran husi Portu ba armajen (MTCI)	\$180,000	\$0	\$0	\$0	0%
5740501	2.3 Garante produsaun liuhusi akisiaun maihusi agrikultura no peska (fertilizante, semente, nsst.) (MAFF)	\$4,952,522	\$4,952,522	\$2,198,290	\$2,754,232	44.39%
	3 Tele-Komunikasaun					
	3.1 Sosa pakote SMS hodi oferece apoiu ba kréditu eletrisidade nian, transferénsia osan no komunikasaun sira seluk	\$0	\$0	\$0	\$0	0%
	3.2 Fornese konektividade ba internet subsidiadu ba estudante ensinu superior no profésór na'in 67,500 no estudante sekundariu na'in 165,000 (MTCI)	\$600,000	\$0	\$0	\$0	0%
	3.3 Implementa sistema alerta ida hodi buka tuir kazu COVID-19 (MTCI)	\$260,000	\$0	\$0	\$0	0%
	4 Neseidade				\$0	
	4.1 Fornese eletrisidade gratuita kada fulan ho valór \$15 ba familia besik 160,555 kada kontadór (MOP)	\$7,686,675	\$0	\$0	\$0	0%
	4.2 Fornese bee gratuita ba uma-kain hotu (MOP)	\$262,680	\$0	\$0	\$0	0%
	5 Kréditu (BNCTL)					
	5.1 Implementa programa reescalonamento (halo fali oráriu) ba pesoál emprestimu no emprezariu iha setor bankaria hotu	\$8,182,500	\$0	\$0	\$0	0%
	5.2 Implementa Fasilitade Kréditu Emerjénsia nianida	\$3,000,000	\$0	\$0	\$0	0%
	5.3 Implementa mekanizmu garantia nian ba importadór Sasán Esensial sira	\$5,000,000	\$0	\$0	\$0	0%
	5.4 Fornese Suporta likidez Prazu Badak nian	\$3,500,000	\$0	\$0	\$0	0%
	6 Apoiu Diretu					
5080505	6.1 Fornese pagamentu osan valór \$200 ba uma-kain ida-idak (MSSI)	\$15,000,000	\$66,856,800	\$66,527,692	\$329,108	99.51%
	6.2 Dezeña no implementa pagamentu subsídu salarial ba beneficiáriu besik 30,000 ne'ebé ne'ebé kobre 60% husi sira-nia saláriu (MSSI)	\$14,688,000	\$0	\$0	\$0	0%
	6.3 Izenaun husi kontribuisaun ba Seguransa Sosial tantu husi traballadór no empregadór sira (traballadór 30,000) (MSSI)	\$2,448,000	\$0	\$0	\$0	0%
	6.4 Izenaun husi selu aluga propriedade Estadu nian ba ema ne'ebé aluga (MJ)	\$1,217,100	\$0	\$0	\$0	0%
5080504	6.5 Tulun estudante timoroan sira iha rai-liur ho despeza subsisténsia nian (MNEK)	\$2,404,850	\$3,233,696	1,343,100	\$1,890,596	41.53%
	TOTÁL	\$88,274,151	\$91,716,636	\$81,031,234	\$10,685,402	88.35%

Nota: despeza balun, hanesan exemplu, estratéjia 1.1 kobre despeza jerál ba estratéjia sira seluk (2.2 no 1.2). Totál ne'ebé gasta ona refere ba totál Atuál. Kompromisu no Obrigasaun tuir rejistru iha relatóriu Freebalance nian. Orsamentu revistu refere ba ajustamentu ne'ebé halo husi Ministériu Finansas, hatudu valór ne'ebé alokadu ona.